

ten besch. mögen. Welcher auch am verwege-
nesten ist/ darff jederman heraus fordern vnd
bochen/sich mit einem jeden balgen vnd rauf-
fen/ vnd am vnnützeften ist/ der ist bey diesen
Leuten der beste Hahn im Korb.

Findet sich aber bisweilen vnter Hundert
einer/ so fleißig/ nüchtern/ bescheiden vnd er-
bar ist/ der gilt nichts/ ist nur ein Pinal/ vn-
terstehen ihn auch zu verhönen vnd zu ver-
unglimpffen/ wo sie können vnd mögen/ vnd
siehet man wenig/ die mit einem solchen viel
begehren vmbzugehen: Dann es ist die Ehre
vnd Liebe zur Tugendt bey solchen freyen o-
der außgelassenen Studenten gar in Abgang
kommen vnd verloschen. Vnd ist dieses also
ein kurzer Begriff / ihres ganken Handels
vnd Wandels/ so lang als sie auff Vniuersi-
teten von ihren Eltern mit grossem Kosten
gehalten werden: Wann sie aber hernach zu
Haus kommen/ vnd die arme Eltern mey-
nen/ sie werden einen wolgelehrten züchtigen
vnd Erbaren Domine zu Haus bekommen/
darvon ihr gankes Geschlechte sol Ehre ha-
ben / so kommet ihnen ein anfangliches ein-
sauberes Gesellchen / ein Disputirer vnd
Schnarcher/ der trawu auch wil wissen / was
die Rüben gelten/ vnd was weiß oder schwarz
ist: Wann es aber eine kleine Zeit gewähret/
so wird man gewahr/ wie die Esels Ohren
mit gewalt herfür stossen/ daß man einen gro-
ben vnnwissenden Schlingel / vnd ein inutile
terrae pondus, eine vnnütze Last der Erden/
hat mit so grossem Kosten außgebracht/ dann
der gute Dominus taugt nirgendt mehr zu:
Ein Handtwerck zu lernen ist er zu groß/ ei-
nem Herrn zu dienen/ ist er zu steiff/ müssen
sich derhalben die Eltern mit Betrübnuß be-
dencken / was sie mit dem Schlingel wöllen
anfangen/ vnter dessen ist er erwachsen/ muß
eine Frawe haben/ nimmet ihm wol selber ei-
ne/ wann er nicht allbereit sich auff der Vni-

uersitet versehen hat/ vnd muß also selbsten
seines Besten gedencen: Vnd wol dem / der
noch die Gabe hat/ daß er kan ein Schulmei-
ster/ ein Schreiber/ ein Corrector, oder Le-
ctor, oder sonsten etwas werden/ daß er den
hungerigen Bauch möge stillen. Da wir ihn
dann lassen sitzen/ schwiszen/ vnd miseriam
cum aceto schmelzen/ biß ihm ein besser Glück
auffstößet. Wöllen vns nun weiter nach an-
dern Leuten vmbsehen.

A N N O T A T I O.

Barges pfeget zu sagen / daß nach der Philo-
sophen Meynung nichts eytels in der Na-
tur were zu finden/ als allein bey den Stu-
denten / bey welchen man meistentheils
dreier Vacuorum köndte gewiß seyn /
nemlich / in ihrem Hirn / in ihrem Beu-
tel/ vnd in ihrer Kunst/ da were zwar Platz
vnd Raum/ aber nichts darinnen / welches
mit Wahrheit ein Vacuum, oder eyteles zu
nennen sey.

— — — — —

Hundert vnd Zwentzer Discurs.

Von Wollen/ vnd allen denen / so sich
beydes mit Kauffmannschafft vnd
mit Arbeit darmit nehren.

Die Heydnische Scribenten geben
sämplich für/ wie Isidorus lib. 19.
bezeuget / es sey Minerua die erste
gewesen / welche die Wolle habe angefangen
zu brauchen / vnd erfunden beydes wie diesel-
bige zu spinnen vnd zu weben / vnd wie man
sie auch in vnterschiedtlichen Farben sol fär-
ben/ wie solches noch auff den heutigen Tag
Doooo im